

Hadžići, 28.06.2011.godine  
Broj: 357/11

**ZAPISNIK I ZAKLJUČCI**  
**SA PETNAESTE SJEDNICE PREDSDJEDNIŠTVA SKUPŠTINE**  
**SAVEZA OPĆINA I GRADOVA FEDERACIJE BIH**

U Hadžićima je dana 28.06.2011. godine održana Petnaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza prisustvovali su: **g-din Vlado Alilović**, načelnik Općine Vitez, **g-din Ermin Hajder**, načelnik Općine Bosanski Petrovac, **g-din Salem Dedić**, načelnik Općine Jablanica, **g-din Rasim Omerović**, načelnik Općine Kalesija i **gđa Azra Stambolić** (po ovlaštenju), pomoćnik načelnika za finansije, Općina Ilidža.

Pored gore navedenih, sjednici su prisustvovali i: **g-din Hamdo Ejubović**, načelnik Općine Hadžići, **g-đa Vesna Travljanin**, direktor Saveza, **g-din Slaviša Šućur**, savjetnik u GAP-u i poslanik u Predstavničkom domu Parlamenta Federacije BiH, **g-din Smajo Šabić**, predsjednik Udruženja pravobranilaca u Federaciji BiH, **g-din Rešad Mašić**, direktor, „Alpha“ d.o.o., **g-đa Dalida Demirović**, Centri Civilnih Inicijativa, **g-đa Zlata Turkić**, viši saradnik za rad sa skupštinskim komisijama i institucijama vlasti, **gđa Elvira Imširović-Bolić**, viši saradnik za pravna pitanja, **gđa Selma Fišek**, viši saradnik za pravna pitanja, **g-đa Dženita Kovačević**, viši saradnik za finansijska pitanja i **g-din Edin Demirović**, saradnik za lokalnu samoupravu.

G-đa Travljanin informiše članove Predsjedništva Skupštine Saveza da g-din Husejin Smajlović, predsjednik Predsjedništva Saveza, nije mogao prisustvovati današnjoj sjednici zbog neodoljivih obaveza koje su mu iznenada iskrisle. Napominje da je ovo prvi put za vrijeme njegovog obnašanja funkcije predsjednika Predsjedništva Saveza da nije prisutan, te će sjednicu voditi g-din Vlado Alilović.

G-din Alilović pozdravlja prisutne i otvara Petnaestu sjednicu Predsjedništva Skupštine Saveza. Zahvaljuje se g-dinu Ejuboviću na gostoprimstvu i daje mu riječ.

G-din Ejubović pozdravlja prisutne i kratko predstavlja Općinu Hadžići.

G-din Alilović predlaže Dnevni red kako slijedi uz prijedlog za dopunu sa tri nove tačke:

1. Odluka o rotaciji predsjednika i zamjenika predsjednika Predsjedništva Skupštine Saveza općina i gradova Federacije Bosne i Hercegovine
2. Usvajanje Zapisnika i Zaključaka sa Četrnaeste sjednice Predsjedništva Skupštine Saveza općina i gradova Federacije Bosne i Hercegovine
3. Izvještaj sa zajedničke sjednice Komisije za ustavna i zakonodavna pitanja i Komisije za ekonomski razvoj općina i gradova i finansije u vezi sa inicijativama:
  - a) Općina Bihać – za izmjenu propisa iz oblasti ugostiteljstva i turizma (Zakon o ugostiteljskoj djelatnosti u Federaciji Bosne i Hercegovine)

- b) Općina Bihać – za izmjenu propisa iz oblasti poduzetništva i obrta (Zakon o obrtu i srodnim djelatnostima u Federaciji Bosne i Hercegovine)
- c) Općina Maglaj – za izradu Uredbe o načinu prikupljanja sredstava po ostalim načinima finansiranja zaštite i spašavanja od prirodnih i drugih nesreća (Zakon o zaštiti i spašavanju u Federaciji Bosne i Hercegovine, član 179)
- d) Udruženje pravobranilaca/pravobranitelja u Federaciji Bosne i Hercegovine – donošenje Odluke o jedinstvenoj evidenciji nekretnina u Federaciji Bosne i Hercegovine
- e) Federalno ministarstvo unutrašnjih poslova – nacrt Zakona o matičnim knjigama u Federaciji Bosne i Hercegovine

Izvjestilac: Hamdo Ejubović, predsjednik Komisije za ekonomski razvoj općina i gradova i finansije

**f) Udruženje pravobranilaca/pravobranitelja u Federaciji Bosne i Hercegovine – prijedlog za izmjenu Zakona o parničnom postupku (nova tačka)**

**Izvjestilac: Smajo Šabić, predsjednik Udruženja pravobranilaca/pravobranitelja u Federaciji Bosne i Hercegovine**

4. Druga konsultativna konferencija na temu: „Funkcionisanje sistema uprave i status zaposlenih u organima uprave u Federaciji BiH – Normativni okvir“

Izvjestilac: Vesna Travljanin, direktor Saveza

5. Projekat „Jačanje kapaciteta saveza općina i gradova Bosne i Hercegovine“ (CDMA)

- a) Određivanje prioriteta Saveza za lobiranje i zastupanje u narednom periodu
- b) Izvještaj sa sastanka Savjetodavnog odbora projekta „Jačanje kapaciteta saveza općina i gradova Bosne i Hercegovine“ (CDMA)
- c) Izvještaj sa Donatorske konferencije
- d) Informacija sa održane radionice „Izrada komunikacijskog plana Saveza“
- e) Panel diskusija za novinare: „Kako izvještavati iz lokalnih zajednica“
- f) Kratak opis i prikaz ponuda za izradu novog loga i cjelokupnog vizuelnog identiteta Saveza (korporativni imidž)

Izvjestilac: Vesna Travljanin, direktor Saveza

6. Inicijativa Centara civilnih inicijativa (CCI) za izmjene Zakona o principima lokalne samouprave u Federaciji Bosne i Hercegovine – Novi modeli mjesnih zajednica u BiH

Izvjestilac: Dalida Demirović, Centri civilnih inicijativa

7. Saradnja Saveza sa Alpha d.o.o. u cilju zajedničkog apliciranja kod Ureda koordinatora za reformu javne uprave sa projektom vezanim za uvođenje trezora u jedinice lokalne samouprave

Izvjestilac: Rešad Mašić, direktor Alpha d.o.o.

8. Informacije:

- a) Sastanak Koordinacionog tijela oba saveza općina i gradova Bosne i Hercegovine
- b) Okrugli sto „Infrastruktura prostornih podataka“
- c) Odgovor Federalnog ministarstva finansija u vezi sa Zakonom o pripadnosti javnih prihoda u Federaciji Bosne i Hercegovine
- d) Odgovor Ustavnog suda Federacije Bosne i Hercegovine na dopis broj: 276/11 koji je uputio Savez općina i gradova FBiH od 02.06.2011. godine (nova tačka)**
- e) Sastanak delegacije Saveza sa predstavnicima Vlade Federacije Bosne i Hercegovine (nova tačka)**

## 9. Tekuća pitanja

Održavanje Šeste Skupštine Saveza općina i gradova Federacije Bosne i Hercegovine

G-din Alilović otvara diskusiju.

Nakon konstatacije da nema prijavljenih za diskusiju, stavlja dopunjeni Dnevni red na glasanje.

**Jednoglasno je usvojen dopunjeni Dnevni red.**

G-din Alilović prelazi na prvu tačku Dnevnog reda.

**1. Odluka o rotaciji predsjednika i zamjenika predsjednika Predsjedništva Skupštine Saveza općina i gradova Federacije Bosne i Hercegovine**

G-đa Travljanin obrazlaže član 24. Statuta Saveza u kojem je određeno da se predsjednik i zamjenik Predsjedništva Skupštine Saveza rotiraju svake dvije godine. Navodi da je Stručna služba Saveza pripremila Odluku o rotaciji predsjednika i zamjenika predsjednika Predsjedništva Skupštine Saveza općina i gradova Federacije Bosne i Hercegovine kao i prigodan poklon i zahvalnicu g-dinu Smajloviću. S obzirom na činjenicu da g-din Smajlović nije došao na današnju sjednicu, predlaže da mu se poklon i zahvalnica uruče na slijedećoj sjednici Predsjedništva Saveza.

G-din Alilović otvara diskusiju.

Nakon konstatacije da nema prijavljenih za diskusiju, stavlja Odluku sa prijedlogom g-đe Travljanin na glasanje.

**Jednoglasno je usvojena Odluka o rotaciji predsjednika i zamjenika predsjednika Predsjedništva Skupštine Saveza općina i gradova Federacije Bosne i Hercegovine sa prijedlogom g-đe Travljanin.**

G-din Alilović se zahvaljuje i prihvata se dužnosti predsjednika Predsjedništva Saveza.

**2. Usvajanje Zapisnika i Zaključaka sa Četrnaeste sjednice Predsjedništva Skupštine Saveza općina i gradova Federacije Bosne i Hercegovine**

G-din Alilović otvara diskusiju.

Nakon konstatacije da nema prijavljenih za diskusiju, stavlja Zapisnik i zaključke na glasanje.

**Zapisnik i zaključci sa Četrnaeste sjednice Predsjedništva Skupštine Saveza općina i gradova su jednoglasno usvojeni.**

**3. Izvještaj sa zajedničke sjednice Komisije za ustavna i zakonodavna pitanja i Komisije za ekonomski razvoj općina i gradova i finansije u vezi sa inicijativama:**

- a) Općina Bihać – za izmjenu propisa iz oblasti ugostiteljstva i turizma (Zakon o ugostiteljskoj djelatnosti u Federaciji Bosne i Hercegovine)
- b) Općina Bihać – za izmjenu propisa iz oblasti poduzetništva i obrta (Zakon o obrtu i srodnim djelatnostima u Federaciji Bosne i Hercegovine)
- c) Općina Maglaj – za izradu Uredbe o načinu prikupljanja sredstava po ostalim načinima finansiranja zaštite i spašavanja od prirodnih i drugih nesreća (Zakon o zaštiti i spašavanju u Federaciji Bosne i Hercegovine, član 179)

- d) Udruženje pravobranilaca/pravobranitelja u Federaciji Bosne i Hercegovine – donošenje Odluke o jedinstvenoj evidenciji nekretnina u Federaciji Bosne i Hercegovine**
- e) Federalno ministarstvo unutrašnjih poslova – nacrt Zakona o matičnim knjigama u Federaciji Bosne i Hercegovine**
- f) Udruženje pravobranilaca/pravobranitelja u Federaciji Bosne i Hercegovine – prijedlog za izmjenu Zakona o parničnom postupku (nova tačka)**

G-din Ejubović u svojstvu predsjednika Komisije za ekonomski razvoj općina i gradova i finansije izvještava o ovoj tački od a) do e). Informiše članove Predsjedništva Saveza da su materijal za ovu tačku dobili u pisanoj formi u vidu Izvještaja sa zajedničke sjednice Komisije za ustavna i zakonodavna pitanja i Komisije za ekonomski razvoj općina i gradova i finansije, te konstatuje da je sve napisano u tom materijalu. Predlaže da se razmotri i nova tačka pod f) - inicijativa Udruženja pravobranilaca/pravobranitelja u Federaciji Bosne i Hercegovine.

G-din Alilović otvara diskusiju.

G-din Šabić, predsjednik Udruženja pravobranilaca/pravobranitelja u Federaciji Bosne i Hercegovine, obrazlaže inicijativu navedenog udruženja u vezi sa prijedlogom za izmjenu Zakona o parničnom postupku. Informiše da je 2003. godine na snagu stupio Zakon o parničnom postupku po kojem su u skladu sa članom 395. pravobraniooci u sudskim postupcima ostvarivali pravo na sudske troškove koji se sastoje od prava na nagradu i prava na naknadu, kao što tu vrstu prava ostvaruju i advokati. Svi ti ostvareni prihodi od naknada i nagrada bili su isključivi prihodi budžeta općina, gradova, kantona i Federacije. Međutim, u toku 2006. godine je usvojen Zakon o izmjenama Zakona o parničnom postupku, te je izmijenjen član 395. na način što je propisano da se nagrada pravobranioocu određuje na osnovu Zakona o pravobranilaštu Federacije Bosne i Hercegovine. Obzirom da spomenutim zakonom nije uopće propisano pravo pravobranioaca na nagradu, od tog perioda pravobraniooci u Federaciji BiH kroz pravo na sudske troškove ne mogu ostvarivati tu vrstu prava. Ovim su uzrokovane višestruke štetne posljedice kao što su:

- Broj parničnih postupaka u kojima se općine i drugi nivoi vlasti pojavljuju kao tuženi je višestruko povećan upravo iz razloga što suprotne strane (tužitelji) eventualnim gubitkom sudskog spora ne rizikuju obavezu naknade pomenute vrste troškova postupka;
- Narušeno je osnovno načelo parničnog postupka i to Načelo ravnopravnosti stranaka u postupku upravo na način što advokat koji zastupa stranku ostvaruje pravo na nagradu i naknadu troškova postupka, dok pravobranilac koji zastupa državu i njene nivoe vlasti ostvaruje samo pravo na naknadu. Bitno je naglasiti da se pravobraniooci po svojim stručnim kvalifikacijama nalaze u istoj pravnoj ravni kao i advokati;
- Onemogućavanjem pravobranioaca da u sudskim postupcima ostvaruju pravo na nagradu, svi nivoi vlasti (općine, gradovi, kantoni i Federacija) gube značajna finansijska sredstva čiji iznos se na godišnjem nivou može mjeriti u milionskim iznosima;
- Onemogućavanjem pravobranioaca da u sudskim postupcima ostvaruju pravo na nagradu posljedično se ugrožava i dignitet pravobranilačke funkcije, a stepen zaštite imovine biva sve manje zaštićen. Nezamislivo je da advokat kao punomoćnik samo jedne fizičke ili pravne osobe ima i ostvaruje sva navedena prava, a pravobranilac koji je zakonski zastupnik države ta prava ne može ostvariti;
- Zbog svega navedenog, pravobraniooci konstantno napuštaju pravobranilačke poslove, te prelaze u sudove, tužilaštva i advokaturu. Sve se to posljedično negativno odražava na ukupan stepen zaštite povjerene imovine i imovinskih interesa države i njenih organa.

Navodi da je Skupština udruženja pravobranilaca na proteklom skupštinskom zasjedanju zauzela jasan stav u vezi sa ovom problematikom, te Vladi Federacije BiH i Federalnom ministarstvu pravde predložila što hitnije donošenje Zakona o izmjenama i dopunama Zakona o parničnom postupku kojim bi bilo

omogućeno da pravobranioci u sudskim postupcima ostvaruju pravo na ukupne troškove postupka koji se sastoje od prava na nagradu i prava na naknadu. Prema njegovim saznanjima, Vlada FBiH je ušla u proceduru izmjena Zakona u cilju otklanjanja navedenih nedostataka, ali nije obezbijedila podršku većine zastupnika u Parlamentu, te je Zakon skinut sa dnevnog reda. Konstatuje da zbog ovakvog stanja općine i ostali nivoi vlasti trpe nesagledive štetne posljedice.

Ističe da Udruženje pravobranilaca od Saveza očekuje podršku, te predlažu da se Savez također obrati prema Vladi FBiH i resornom ministarstvu sa inicijativom što hitnijeg postupanja po prijedlogu Udruženja pravobranilaca. Ukoliko izvršni i zakonodavni organi ne postupe po dostavljenim prijedlozima i sugestijama, a u cilju zaštite imovine i imovinskih interesa općina, predlažu pokretanje postupka ocjene ustavnosti navedenih zakonskih odredbi pred Ustavnim sudom Federacije BiH.

G-din Omerović navodi da je upoznat sa ovim problemom i smatra da su pravobranioci poniženi u odnosu na advokate, a štite državnu imovinu. Ističe da naknada ne bi išla lično pravobraniocima, već jedinicama lokalne samouprave. Konstatuje da općine teško dobijaju pravobranioce, uvjeti za njihov prijem su jako strogi, a oni s druge strane ne dobijaju adekvatnu naknadu kao advokati. Smatra da Savez treba pokrenuti postupak pred Ustavnim sudom FBiH.

G-din Šućur obrazlaže zbog čega je Zakon povučen sa sjednice Parlamenta. Navodi da se klubovi stranaka nisu usaglasili. Predlaže da Savez pokrene inicijativu prema resornom ministarstvu i izlobira klubove. Ističe da u ovom slučaju i Federacija ima interes.

G-din Omerović traži obrazloženje u vezi sa tačkom d), odnosno, donošenjem Odluke o jedinstvenoj evidenciji nekretnina u Federaciji Bosne i Hercegovine.

G-din Šabić ističe da nije promašaj ulagati u pravobranilačku funkciju, jer će time jedinice lokalne samouprave dobiti višestruko više. Zatim obrazlaže tačku d). Navodi da se nekretnine u vlasništvu općine nalaze u istoj ravni pravne zaštite kao i nekretnine pojedinca. Postoji mogućnost da pojedinac koji se nalazi u posjedu nekretnine stekne pravo vlasništva na istoj, jer je tako zakonom predviđeno. Konstatuje da su općine pasivne, možda i iz razloga što ne znaju gdje se predmetna nekretnina nalazi. Skupština Udruženja pravobranilaca je raspravljala o prisutnoj problematici nepostojanja jedinstvene baze podataka o nekretninama koje su u vlasništvu općina, gradova, kantona i Federacije, te je donijela odluku o nužnosti uspostave registara nekretnina kojim upravljaju ili se nalaze u njihovom vlasništvu. Navedenu odluku su dostavili Savezu na razmatranje i predložili da o istoj Savez upozna sve općine u Federaciji BiH kako bi iste poduzele mjere i radnje neophodne za kvalitetno formiranje jedinstvene baze podataka o nekretninama u vlasništvu općina.

G-đa Stambolić smatra da termin „nagrada“ stvara zabunu. U potpunosti podržava inicijativu u vezi sa izmjenama Zakona o praničnom postupku. Što se tiče inicijative Općine Bihać, smatra da hotel ne treba imati isti status kao i ostali objekti kod dopunske djelatnosti, te predlaže da se na to obrati malo pažnje.

G-đa Travljanin upoznala je prisutne sa historijatom nastanka Zakona o praničnom postupku, jer je u to vrijeme radila u OHR-u upravo na reformi pravosuđa.

G-din Alilović moli g-dina Šabića da obrazloži svoj status pravobranioaca.

G-din Šabić navodi da je Općina Kakanj, u kojoj je on pravobranilac, imala sluha za njegove zahtjeve. On lično je iznad ranga državnih službenika, ali je to Općini uzvratilo. Navodi da će još dva dana raditi kao pravobranilac, a nakon toga odlazi u sud u Zenicu. Upoznat je da je u Srednjobosanskom kantonu izražen problem sa pravobraniocima.

G-din Hajder predlaže da se usvoji ova inicijativa jer je jako bitna oblast, od krucijalnog značaja, te se zbog toga treba podići na viši nivo.

G-din Omerović upoznaje prisutne da u svojoj Općini ima pravobranioaca koji zastupa dvije općine i da je u rang u iznad državnih službenika.

G-din Alilović smatra da je radno mjesto pravobranioaca veoma važno. Predlaže da se usvoji ova inicijativa i uputi u dalju proceduru, kao i Izvještaj sa zajedničke sjednice Komisije za ustavna i zakonodavna pitanja i Komisije za ekonomski razvoj općina i gradova i finansije.

G-đa Travljanin informiše da je donatorima već spominjala da treba educirati pravobranioce i izmijeniti zakon.

**Jednoglasno je usvojena inicijativa Udruženja pravobranilaca/pravobranitelja u Federaciji Bosne i Hercegovine u vezi sa izmjenom Zakona o parničnom postupku kao i Izvještaj sa zajedničke sjednice Komisije za ustavna i zakonodavna pitanja i Komisije za ekonomski razvoj općina i gradova i finansije.**

#### **4. Druga konsultativna konferencija na temu: „Funkcionisanje sistema uprave i status zaposlenih u organima uprave u Federaciji BiH – Normativni okvir“**

G-đa Travljanin ukratko izvještava o tome šta je do sada Savez uradio po pitanju ovog zakona, te daje riječ g-đi Imširović-Bolić za dodatna pojašnjenja.

G-đa Imširović-Bolić informiše prisutne da se 22. i 23. juna u organizaciji Federalnog ministarstva pravde i Agencije za državnu službu Federacije BiH (uz finansijsku podršku OSCE-a) održala Druga konsultativna konferencija, te ih upoznaje sa zvaničnim zaključcima sa ove konferencije. Ističe da je u okviru konferencije bio organizovan rad po grupama, odnosno u tri radne grupe, a svaka radna grupa je razmatrala po jedan zakon - Zakon o državnim službenicima i namještenicima u organima državne službe u FBiH, Zakon o zaposlenicima u organima jedinica lokalne samouprave i Model kantonalnog zakona o državnim službenicima i namještenicima. Svaka radna grupa je pripremila zaključke za zakon koji je obrađivala. U okviru radne grupe koja je radila na Zakonu o zaposlenicima u organima jedinica lokalne samouprave pojavilo se nekoliko dilema. S obzirom na plan da u parlamentarnu proceduru paralelno idu Zakon o državnim službenicima i namještenicima u organima državne službe u FBiH i Zakon o zaposlenicima u organima jedinica lokalne samouprave, odnosno da do 15.09.2011. godine trebamo imati konačan tekst Zakona o zaposlenicima u organima jedinica lokalne samouprave, moli članove Predsjedništva Saveza da se na današnjoj sjednici izjasne u vezi sa nejasnoćama i dilemama koje postoje. U toku mjeseca jula bi se sastala Radna grupa Saveza (koja je pripremila tekst Zakona o zaposlenicima u organima jedinica lokalne samouprave) zajedno sa predstavnicima Federalnog ministarstva pravde i Agencije za državnu službu FBiH, a uz finansijsku podršku OSCE-a, da u skladu sa smjernicama Predsjedništva Saveza i zaključcima sa konferencije uradi konačan tekst ovog zakona. G-đa Imširović-Bolić iznosi prvu dilemu u vezi sa nazivom Zakona o zaposlenicima u organima jedinica lokalne samouprave - da li koristiti termin „zaposlenik“ ili „državni službenik“. Napominje da sindikat insistira da bude „državni službenik“.

G-din Omerović ističe da je njegov stav u vezi sa nazivom zakona da se zadrži postojeći naziv. Smatra da se prvo treba pronaći odgovor na pitanje ko je u općini državni službenik. Tvrdi da u općini nije niko državni službenik, niko kome je načelnik nadređen. Ističe da je jako bitna pokretljivost kadrova, te smatra da se treba zakonski osigurati pokretljivost kadrova unutar općine. Što se tiče prijema zaposlenika, navodi da postoji problem u tome što Agencija za državnu službu FBiH ne radi na isti način na nivou cijele Federacije BiH, odnosno u svim kantonima. Iz tog razloga je potrebno te procedure definisati na jedinstven način. Informiše o vođenju disciplinskog postupka, drugostepenoj instanci. Smatra da treba čuti i glas sindikata i radnika. Njegov stav po pitanju evidencije u registru je da se treba voditi jedinstvena evidencija na nivou cijele Federacije BiH.

G-din Šućur informiše da je stav Evropske unije da moraju biti uključeni u izradu konačnih prijedloga ovih zakona. Federacija ima pravo da propiše određene standarde. Napominje da je novina u Zakonu o državnim službenicima i namještenicima u organima državne službe u FBiH da će namještenici ostati samo oni koji rade na poslovima osnovne djelatnosti. Smatra da Savez treba uključiti svoje ljude u rad sa Evropskom unijom.

G-din Omerović smatra da se moramo boriti za zakon koji će poboljšati situaciju u jedinicama lokalne samouprave. Konstatuje da su u Republici Srpskoj bolja zakonska rješenja u ovoj oblasti od Federacije BiH.

G-din Alilović ističe da danas treba pokušati otkloniti dileme koje su se pojavile, kako bi Radna grupa Saveza nastavila sa radom i kako bismo imali efikasniji zakon. Smatra da sam naziv zakona nije toliko bitan.

G-đa Travljanin ističe da se mora naći neko kompromisno rješenje.

G-din Alilović konstatuje da je g-din Šupljeglav najviše uključen u ovo.

G-din Šućur smatra da se trebaju imati argumenti koji će ubijediti Evropsku uniju da se sa ovim zakonskim rješenjima pravi korak naprijed u reformi javne uprave.

G-đa Imširović-Bolić izlaže zaključak Radne grupe sa konferencije u vezi sa procesom prijema zaposlenika.

Predsjedništvo Saveza se slaže sa iznesenim.

G-dina Hajdera zanima koja su rješenja predviđena za pomoćnike i sekretara vijeća.

G-din Šućur konstatuje da je to uvijek dilema.

G-đa Imširović-Bolić iznosi dilemu Radne grupe sa konferencije u vezi s tim pitanjem.

G-din Hajder smatra da vijeće ne može imenovati sekretara.

G-din Omerović navodi da su i do sada imali mogućnost angažovanja savjetnika. Konstatuje da je Visoki predstavnik nametnuo Zakon 2002. godine. Smatra da je naš cilj da se omogući pokretljivost sekretara i rukovodilaca unutrašnjih organizacionih jedinica unutar jedinstvenog općinskog organa.

G-din Hajder ističe da je veliki teret da prisutni na današnjoj sjednici odluče o ovako značajnom pitanju. Smatra da se zaključci sa konferencije moraju detaljno razmotriti.

G-đa Imširović-Bolić napominje da je sezona godišnjih odmora, te da nema puno vremena za pripremu konačnog teksta Zakona.

G-đa Travljanin i g-din Šućur smatraju da se mora dati vremena da se članovi Predsjedništva Saveza izjasne o dilemama.

G-din Dedić ističe da prisutni na današnjoj sjednici ne mogu o ovim dilemama odlučiti, te predlaže da se Predsjedništvo Saveza o ovome izjasni naknadno.

G-đa Imširović-Bolić upoznaje prisutne i o ostalim dilemama.

**Jednoglasno je usvojeno da se Zapisnik i zaključci sa Druge konsultativne konferencije na temu: „Funkcionisanje sistema uprave i status zaposlenih u organima uprave u Federaciji BiH – normativni okvir“ zajedno sa Zakonom o državnim službenicima i namještenicima u organima državne službe u FBiH i Zakonom o zaposlenicima u organima jedinica lokalne samouprave upute članovima Predsjedništva Saveza da se u roku od sedam dana očituju prema Radnoj grupi Saveza koja radi na tekstu Zakona o zaposlenicima u organima jedinica lokalne samouprave, kako bi ista pripremila konačan tekst Zakona.**

## **5. Projekat „Jačanje kapaciteta saveza općina i gradova Bosne i Hercegovine“ (CDMA)**

G-đa Travljanin informiše o projektu „Jačanje kapaciteta saveza općina i gradova Bosne i Hercegovine“ (CDMA). Navodi da je prošlo pola godine od početka implementacije spomenutog projekta, pa želi da informiše Predsjedništvo Saveza kako slijedi po tačkama dokle se došlo sa aktivnostima.

### **a) Određivanje prioriteta Saveza za lobiranje i zastupanje u narednom periodu**

G-đa Fišek obrazlaže da je namjera da se u okviru ove tačke prodiskutuje o eventualnim prioritetima Saveza u pogledu zakona na kojima će se raditi u narednom periodu. Navodi zakone koji su određeni kao prioriteta na posljednjoj sjednici Skupštine Saveza kao i zakone koji su usvojeni u okviru Programa Vlade Federacije BiH za 2011. godinu. Neki od tih zakona su: Zakon o zaposlenicima u organima jedinica lokalne samouprave, Zakon o šumama, Zakon o premjeru i katastru nekretnina, Zakon o finansiranju jedinica lokalne samouprave, Zakon o javno-privatnom partnerstvu, Zakon o konsolidaciji itd.

**Informacija je primljena k znanju.**

**b) Izvještaj sa sastanka Savjetodavnog odbora projekta „Jačanje kapaciteta saveza općina i gradova Bosne i Hercegovine“ (CDMA)**

G-đa Travljanin informiše da je 08.06.2011. godine u Općini Stari Grad Sarajevo održan drugi sastanak Savjetodavnog odbora projekta „Jačanje kapaciteta saveza općina i gradova Bosne i Hercegovine“. Informiše da su u okviru projekta uspostavljene nove usluge Saveza u vidu pravnog i finansijskog savjetovaništa, da je pripremljen dokument Strategije razvoja Saveza, te da je urađena nova web stranica.

**Informacija je primljena k znanju.**

**c) Izvještaj sa Donatorske konferencije**

G-đa Travljanin informiše da je 09.06.2011. godine održana Donatorska konferencija na kojoj je bilo prisutno oko 30 raznih organizacija. Cilj konferencije je bio da se sinhronizuju inicijative i projekti u oblasti lokalne samouprave. Smatra da je to zaista bilo potrebno, te misli da se treba nastaviti sa tom praksom u budućnosti. Konstatuje da je ovom konferencijom pokrenuta jedna mreža iz oblasti lokalne samouprave.

**Informacija je primljena k znanju.**

**d) Informacija sa održane radionice „Izrada komunikacijskog plana Saveza“**

G-din Demirović informiše da je Savez prije tri godine uputio dopis svim članicama u kojem su zamoljene da imenuju koordinate za rad sa Savezom. Svi koji su imenovani za koordinate su visoko rangirani službenici u općinama. Konstatuje da je sa većinom imenovanih komunikacija na jako visokom nivou. Međutim, ima slučajeva da se pojedini koordinatori nedovoljno interesuju za rad sa Savezom. Ističe da je Savez, vođen tom činjenicom, organizirao radionicu na temu: „Izrada komunikacijskog plana Saveza“. Navodi da će uskoro uslijediti izrada dokumenta u formi preporuke koji će biti dostavljen članovima Predsjedništva Saveza na usvajanje.

**Informacija je primljena k znanju.**

**e) Panel diskusija za novinare: „Kako izvještavati iz lokalnih zajednica“**

G-din Demirović informiše da je 23.06.2011. godine održana panel diskusija za novinare na temu: „Kako izvještavati iz lokalnih zajednica.“ Moderator skupa bio je istaknuti novinar Goran Milić. Glavni cilj ove diskusije bio je povećanje interesovanja medija za različita pitanja i probleme lokalnih zajednica. Na ovaj način se želio propagirati novi način komunikacije sa jedinicama lokalne samouprave, te ukazati na potrebu prezentiranja dobrih praksi općina. Konstatovano je da u javnim emiterima nije dovoljno zastupljena lokalna zajednica.

**Informacija je primljena k znanju.**

**f) Kratak opis i prikaz ponuda za izradu novog loga i cjelokupnog vizuelnog identiteta Saveza (korporativni imidž)**



G-din Demirović napominje da je Predsjedništvo Saveza na prošloj sjednici usvojilo zaključak da se u vezi sa ovom tačkom pripremi prijedlog projekta. Ističe da bi se sa ovim projektom trebao poboljšati imidž Saveza. Projekat uključuje kompletnu paletu novih proizvoda: novi logo, memorandum itd. Savez je u međuvremenu uputio poziv za dostavljanje ponuda. Ovaj projekat će se finansirati iz sredstava CDMA projekta, tačnije SIDA-e, ali bi Predsjedništvo Saveza trebalo da da saglasnost da se uđe u izradu novog identitea.

**Jednoglasno je usvojeno da Predsjedništvo Saveza daje saglasnost da Stručna služba započne sa aktivnostima na ovom projektu.**

G-din Osmanagić moli članove Predsjedništva Saveza da se kratko vrate na tačku a). Konstatuje da je g-đa Fišek pripremila listu zakona vezanih za ovu tačku, te moli Predsjedništvo Saveza da se očituje koji su zakoni prioriteti Saveza za lobiranje u narednom periodu. Smatra da bi bilo dobro da se dodaju još neki zakoni koji će se uskoro naći u proceduri, a ne nalaze se na listi.

G-đa Travljanin obrazlaže da u okviru Saveza djeluju komisije koje rade taj posao, a Predsjedništvo Saveza potvrđuje.

G-din Šućur predlaže da se u prioritete Saveza uvrsti Zakon o koncesijama.

G-din Hajder smatra da se trebaju kvalitetnije koristiti mehanizmi i alati lobiranja.

## **6. Inicijativa Centara civilnih inicijativa (CCI) za izmjene Zakona o principima lokalne samouprave u Federaciji Bosne i Hercegovine – Novi modeli mjesnih zajednica u BiH**

G-đa Dalida Demirović konstatuje da je inicijativa Centara Civilnih Inicijativa vezana za izmjene Zakona o principima lokalne samouprave u Federaciji BiH – novi modeli mjesnih zajednica u BiH - podrobno obrazložena u materijalima koji su ranije dostavljeni svim članovima Predsjedništva Saveza. Ukratko informiše o aktivnostima nevladine organizacije CCI. Navodi da je ovaj projekat počeo prije godinu i po dana, te da je Savez bio uključen u njega, kao i nekoliko načelnika. Rezultati njihovog istraživanja pokazuju da su građani istakli da im je najlakše komunicirati preko mjesnih zajednica. Ističe da su istaknuti eksperti iz oblasti lokalne samouprave uradili analizu stanja mjesnih zajednica u BiH. Također je urađen pilot projekat u nekoliko općina u Federaciji BiH: Bosanski Petrovac, Centar Sarajevo, Livno. Zaključeno je da je stanje u mjesnim zajednicama mnogo drugačije u odnosu na ranije stanje, te da je sadašnji model mjesnih zajednica nefunkcionalan i da ga treba mijenjati. Navodi da su inicijativu za izmjenu zakonske regulative u ovoj oblasti uputili Parlamentu Federacije BiH i Ministarstvu lokalne samouprave Republike Srpske. Napominje da su sa federalnim ministrom pravde obavili nekoliko razgovora vezanih za ovu temu, te da će tražiti da se u program rada Vlade Federacije BiH uvrsti izmjena Zakona o principima lokalne samouprave u Federaciji BiH. Konstatuje da je situacija u ovoj oblasti u Federaciji BiH šarolika od općine do općine. Smatraju da se Zakon o principima lokalne samouprave u Federaciji BiH treba izmijeniti na slijedeći način:

1. Prenijeti određene općinske nadležnosti na mjesne zajednice,
2. Precizno regulirati odnos između općina i mjesnih zajednica,
3. Propisati postojanje više tipova mjesnih zajednica i to barem dvije vrste – gradske i seoske sa različitim nadležnostima,
4. Propisati organizacionu strukturu mjesnih zajednica, način izbora i ovlaštenja njenih organa,
5. Predvidjeti mehanizam kako bi mjesne zajednice bile aktivno uključene u proces planiranja općinskog budžeta,
6. Propisati obavezu lokalnih zajednica da informiraju građane o zbivanjima u općinama i mjesnim zajednicama,
7. Osigurati mjesnim zajednicama pravo sticanja i raspolaganja imovinom,
8. Osigurati da mjesne zajednice svojim posebnim projektima koji nisu predviđeni budžetom mogu konkurirati na općinska sredstva.

Ističe da su oni otvoreni za sve prijedloge. Navodi da su iz RS-a dobili dopis da je njihova inicijativa prošla. Što se tiče Federacije BiH, inicijativa je bila na dnevnom redu Komisije za lokalnu samoupravu Predstavničkog doma Parlamenta FBiH, te je odatle upućena Federalnom ministarstvu pravde na postupanje. Navedeno je da spomenuto Ministarstvo radi sa Savezom, ali im nije poznato da li je isto kontaktiralo Savez.

G-din Hajder ističe da je po pitanju mjesnih zajednica situacija kompleksna. Negdje one funkcionišu, a negdje ne. Smatra da to ne bi funkcionisalo ni sa izmjenom zakona. Skeptik je po ovom pitanju. Misli da mjesne zajednice treba učiti da budu dio sistema. To je proces i na tome treba raditi. U izlaganju g-đe Demirović je primijetio prijedlog da mjesne zajednice apliciraju na projekte samostalno. Navodi da su općine donijele strategije lokalnog razvoja i to se kosi sa ovim prijedlogom. Smatra da prostora i sada ima, ali je pitanje kako mjesne zajednice prihvataju svoju obavezu. Misli da treba podržati inicijativu za izmjenu odnosa građana, ali nije za to da se kroz zakonsko rješenje mjesnim zajednicama da više prostora.

G-din Dedić ističe da je upoznat sa radom CCI. Navodi da mu je drago da su se zainteresirali za ovu oblast. Konstatuje da Zakon o principima lokalne samouprave u Federaciji BiH nije implementiran u mnogim oblastima, te da nisu doneseni kantonalni zakoni. Govori o svom iskustvu u ovoj oblasti, te o izboru sekretara mjesnih zajednica u općini koju predstavlja. Navodi da su sekretari mjesnih zajednica odmah nakon izbora na sjednici tražili da im se udupla naknada za njihov rad. Suzdržan je i skeptik povodom ove inicijative. Smatra da građani i sada imaju mogućnost učestvovanja.

G-đa Stambolić informiše o situaciji u ovoj oblasti na području općine Ilidža. Navodi da su mjesne zajednice ranije imale svoje račune, ali da sredstva nisu trošili transparentno. Načelnik nije mogao uticati na njih u tom pogledu. Sada su im ukinuti računi. U budžetu imaju ostavljena sredstva, tako da mjesne zajednice koje su aktivne dobiju sredstva bez problema. Smatra da ukoliko bi se vršio prenos sredstava, pojavio bi se sukob vlasti, jer bi se mjesne zajednice podigle iznad načelnika i vijeća. Konstatuje da svi teže dobrom rješenju, ali se na kraju desi da se proizvede negativan uticaj na terenu.

G-din Alilović smatra da se o ovoj inicijativi treba raspravljati, ali istovremeno izražava bojazan pojave inicijativa za formiranje novih općina.

G-din Šućur informiše o nastajanju Zakona o principima lokalne samouprave u Federaciji BiH koji je stupio na snagu 2006. godine. Kao jedan od autora ovog zakona, konstatuje da se jako puno raspravljalo o istome. Ističe da i sada ima mogućnosti u zakonu, samo to treba koristiti. Smatra da treba prvo uraditi analizu dobrih, ali i loših praksi. Predlaže temu za razmišljanje - Kako jačati ulogu mjesne zajednice. Smatra da se inicijativa treba uputiti svim općinama da se o ovome dobro raspravi, te da se nakon toga ponovno obradi u okviru Saveza.

G-din Omerović smatra da je dobra strana ovoga da se prati stanje u navedenoj oblasti, te da načelnici dobiju inpute sa strane. Ističe da i sada ima u zakonu prostora za rješenje ovoga što traži CCI po svim tačkama. Navodi da bi on lično volio da se riješi pitanje imovine. Informiše da u općini koju on predstavlja postoji 21 mjesna zajednica sa svojim računima, te da tako funkcionišu. Usporedbe radi, navodi primjer iz susjedne općine koja pripada Republici Srpskoj u kojoj nema ni jedne mjesne zajednice, samo općina.

**Jednoglasno je usvojeno da Stručna služba uputi Inicijativu Centara civilnih inicijativa (CCI) za izmjene Zakona o principima lokalne samouprave u Federaciji Bosne i Hercegovine – novi modeli mjesnih zajednica u BiH - svim članicama radi dostavljanja mišljenja, komentara, prijedloga i sugestija u vezi sa istom.**

## **7. Saradnja Saveza sa Alpha d.o.o. u cilju zajedničkog apliciranja kod Ureda koordinatora za reformu javne uprave sa projektom vezanim za uvođenje trezora u jedinice lokalne samouprave**

G-din Mašić nakon podjele stikova (na kojima se nalazi prezentacija ove tačke dnevnog reda) članovima Predsjedništva, prezentira projekat uvođenja trezorskog poslovanja u jedinicama lokalne samouprave u Federaciji BiH. Navodi da su aktivnosti na ovom projektu počele u septembru mjesecu prošle godine. Informiše da je Federalno ministarstvo finansija u prijedlogu projekta tražilo 20 miliona KM za nabavku opreme u ove svrhe. Ističe da je taj prijedlog ministarstva glatko odbijen, a ministarstvo nije podnijelo alternativni prijedlog projekta. Obrazlaže da je na raspolaganju bilo ukupno 4 miliona KM, te je ovaj zahtjev od 20 miliona bio prevelik. Smatra da je šteta što nije podnesena alternativa. Navodi koji su projekti odobreni. Obavještava prisutne da je na 53. sjednici Vijeća ministara koja je održana prije dvije sedmice usvojen Akcioni plan u kojem je odobreno 1.200.000,00 eura za uvođenje trezorskog poslovanja u općine u Federaciji BiH. Misli da je sve teklo jako sporo jer se radi o najsloženijem sistemu. Obrazlaže šta sadrži projekat. Ističe da je njegova firma Alpha d.o.o. 12.04.2011. godine predložila Savezu moguću saradnju u ovoj oblasti. Napominje da su Švedska i Norveška uložile šest miliona eura u fond za reformu javne uprave. Nadzorni tim Ureda koordinatora za reformu javne uprave je prihvatio ideju firme Alpha d.o.o., te istu stavio u Akcioni plan. Na sjednici Predsjedništva Saveza održanoj 19.05.2011. godine usvojeno je da Alpha d.o.o. pripremi projekat, te u skladu s tim prezentira projekat. Dana 14.06.2011. godine održana je 153. sjednica Vijeća ministara BiH, te je na istoj usvojena Informacija o revidiranom Akcionim planom. Postavlja pitanje implementacije projekta u budućnosti, te u vezi s tim obrazlaže da ima namjeru da obiđe sve općine u Federaciji BiH, izvrši analizu stanja i pripremi stručnu studiju. Nakon toga bi uslijedila isporuka i instalacija opreme, programa i obuka. U međuvremenu bi se obavio postupak javnih nabavki. Napominje da su svi članovi Predsjedništva Saveza dobili materijal za ovu tačku u pripremi za ovu sjednicu. Namjera mu je da općine konsultuje kroz pisanu Anketu i Upitnik, te kroz neposredni uvid u stanje i potrebe. Nakon toga slijede procedure javnih nabavki, a u finalnoj fazi, isporuka opreme i instalacije programa. Navodi da bi općine bile u obavezi nakon dostavljanja popunjenog Upitnika da uplate iznos od 3.000 KM plus PDV. Izvještaje o nalazima, stanju i potrebama dostaviće Predsjedništvu Saveza, PARCO-u, Federalnom ministarstvu finansija i donatorima. Informiše Predsjedništvo Saveza i o ostalim projektima na kojima radi njegova firma. Navodi da će prilikom posjete općinama prezentirati povoljne kreditne linije za općine.

G-din Hajder konstatuje da su različite trenutne potrebe općina, a da su im iste obaveze. Traži odgovor na pitanje kako to poravnati.

G-din Mašić odgovara da će fokus staviti na pojačanje infrastrukture u finansijama, po jedan softver. To sve zavisi od stanja u svim općinama, jer za sada se to još ne zna.

G-din Hajder konstatuje da je prvi korak apliciranje.

G-din Mašić ističe da će se pojaviti više prostora ukoliko se desi da aplicira manji broj općina. Navodi da kod Ureda koordinatora za reformu javne uprave još nije bio ni jedan projekat koji se nije realizirao. Konstatuje da je sve stvar lobiranja.

G-dina Alilovića zanima da li je g-din Mašić u kontaktu sa Koordinatorom za reformu javne uprave.

G-din Mašić odgovara da jeste, te napominje da je sa donatorom nešto manje. Navodi da se svi dokumenti koje je danas pominjao nalaze na stiku koji je podijelio.

G-dina Hajdera zanima kakva je procedura za općine koje se kasnije žele priključiti.

G-din Mašić navodi da će krajnji rok biti početak oktobra, te da će do tada svi imati vremena da se uključe.

G-dina Šućura zanima ko je formalno aplicirao u fond.

G-din Mašić navodi da sam fond pravi reformske korake, a oni su došli sa idejom.

G-dina Šućura zanima koliko sredstava ide direktno općinama.

G-din Mašić odgovara da sva sredstva idu općinama, 1.200.000,00 eura.

G-đa Travljanin predlaže da se informacija primi k znanju, te da Predsjedništvo Saveza odluči o daljem toku saradnje sa Alpha d.o.o.

G-din Mašić predlaže da njegova firma modifikuje ovo što je izneseno na današnjoj sjednici, te da se ide prema općinama. Ističe da je vrlo važno da se ne kasni sa ovim projektom, jer na taj način općine troše svoja sredstva, a ista postoje u projektu.

**Jednoglasno je usvojeno da Alpha d.o.o. modifikuje izneseno na današnjoj sjednici, te da se s tim ide prema općinama.**

## **8. Informacije:**

### **a) Sastanak Koordinacionog tijela oba saveza općina i gradova Bosne i Hercegovine**

G-đa Imširović-Bolić podsjeća da je na prošloj sjednici Predsjedništva Saveza usvojena inicijativa Saveza opština i gradova Republike Srpske za izmjenu Izbornog zakona Bosne i Hercegovine. S obzirom na činjenicu da je Savez općina i gradova Federacije BiH organizirao prošli sastanak Koordinacionog tijela oba saveza općina i gradova Bosne i Hercegovine, Savez opština i gradova republike Srpske je preuzeo obavezu organiziranja slijedećeg sastanka na kojem bi se razmatrala inicijativa za izmjenu Izbornog zakona BiH. Predsjedništvo Saveza je na prošloj sjednici usvojilo da se dnevni red Koordinacionog tijela proširi sa Zakonom o zaštiti i dobrobiti životinja. Zaposlenici Saveza opština i gradova Republike Srpske su obavijestili Stručnu službu Saveza da bi mogući datum održavanja sastanka Koordinacionog tijela mogao biti 07.07.2011. godine. Navodi da će tokom sutrašnjeg dana Stručna služba Saveza imati više informacija o datumu održavanja sastanka.

**Informacija je primljena k znanju.**

### **b) Okrugli sto „Infrastruktura prostornih podataka“**

G-đa Imširović-Bolić informiše da je 21.06.2011. godine u organizaciji Federalnog ministarstva prostornog uređenja i Federalne uprave za geodetske i imovinsko-pravne poslove održan okrugli sto na temu: „Infrastruktura prostornih podataka“. Navodi da su informaciju u vezi sa navedenim dobili u pisanoj formi u materijalima. Okruglom stolu su u ime Saveza prisustvovali g-din Hazbo Ličina koji je u ime Saveza pripremao tekst Zakona o premjeru i katastru nekretnina i g-đa Imširović-Bolić. Prisustvovanje ovom okruglom stolu je bilo korisno iz razloga što su organizatori ukazali na neophodnost ugradnje INSPIRE direktive u domaće zakonodavstvo iz ove oblasti.

**Informacija je primljena k znanju.**

### **c) Odgovor Federalnog ministarstva finansija u vezi sa Zakonom o pripadnosti javnih prihoda u Federaciji Bosne i Hercegovine**

G-đa Dženita Kovačević obavještava članove Predsjedništva Saveza da su pristigli odgovori na dvije inicijative koje su od strane Saveza upućene Federalnom ministarstvu finansija. Inicijativa za izmjenu Zakona o pripadnosti javnih prihoda u FBiH u dijelu koji se odnosi na raspodjelu prihoda po osnovu poreza na dohodak, kojom se tražilo da se postotak koji pripada općinama zakonski utvrdi u visini od 50% na nivou Federacije BiH, odbijena je s obrazloženjem da je federalni zakon utvrdio minimalni postotak, te da je određivanje istog u nadležnosti kantonalnih zakona. Dalje navodi da Inicijativa za revidiranje Zakona o pripadnosti javnih prihoda FBiH, s aspekta izuzimanja općina od odplate duga po osnovu Stand by aranžmana sa MMF-om, nije dala zadovoljavajući odgovor. G-đa Kovačević smatra da se Savez treba aktivno uključiti u predstojeće aktivnosti analize javnih prihoda u FBiH u saradnji sa Federalnim ministarstvom finansija. Pored ovoga, iznosi da su u proceduri još dvije inicijative prema Federalnom ministarstvu finansija: Inicijativa za izmjenu Zakona o porezu na dohodak, te Inicijativa za

izuzimanje općina iz Zakona o fiskalnim sistemima. Očekuje se da će na sljedećoj sjednici Vlade FBiH biti usvojen prijedlog odluke kojom će biti regulisano izuzimanje jedinica lokalne samouprave iz Zakona o fiskalnim sistemima.

**Informacija je primljena k znanju.**

**d) Odgovor Ustavnog suda Federacije Bosne i Hercegovine na dopis broj: 276/11 koji je uputio Savez općina i gradova FBiH od 02.06.2011. godine (nova tačka)**

G-đa Imširović-Bolić informiše da je Stručna služba u skladu sa zaključcima sa posljednje sjednice Predsjedništva Saveza, Ustavnom sudu Federacije BiH uputila dopis u kojem je izražena zabrinutost zbog nepoštivanja njihovih odluka, te predložila održavanje zajedničkog sastanka sa predsjednicom ove institucije. Odgovor od Ustavnog suda FBiH je došao 25.06.2011. (u petak), te je iz tog razloga podijeljen tek danas članovima Predsjedništva Saveza. Navodi da su u odgovoru taksativno navedene presude Suda koje se odnose na zaštitu prava na lokalnu samoupravu, a nisu izvršene. Također je navedeno da je Sud za svaku neizvršenu presudu donio posebna rješenja kojima je konstatovano da određena presuda nije izvršena. Navedena rješenja su dostavljena Kantonalnom tužilaštvu radi razmatranja i poduzimanja odgovarajućih mjera u okviru svoje nadležnosti. Ističe da se o predloženom sastanku nisu očitovali.

**Informacija je primljena k znanju.**

**e) Sastanak delegacije Saveza sa predstavnicima Vlade Federacije Bosne i Hercegovine**

G-đa Travljanin u vezi sa ovom tačkom dnevnog reda informiše da je prilikom održavanja Druge konsultativne konferencije na temu: „Funkcionisanje sistema uprave i status zaposlenih u organima uprave u Federaciji BiH – normativni okvir“ imala priliku da razgovara sa federalnim ministrom pravde, g-dinom Zoranom Mikulićem. S obzirom na činjenicu da su resorno ministarstvo za lokalnu samoupravu, najavila mu je posjetu delegacije Saveza. Međutim, g-din Mikulić je odgovorio da je trenutno veoma zauzet, te iz tog razloga nisu precizirali datum posjete.

**Informacija je primljena k znanju.**

G-dina Šućura zanima da li postoji analiza koliko će općine i gradovi biti oštećeni činjenicom da će indirektno sufinansirati dug po osnovu Stand by aranžmana sa MMF-om.

G-đa Kovačević odgovara da ne postoji.

## **9. Tekuća pitanja**

### **Održavanje Šeste Skupštine Saveza općina i gradova Federacije Bosne i Hercegovine**

G-đa Travljanin informiše Predsjedništvo Saveza da je održavanje Šeste Skupštine Saveza planirano za 06. i 07. oktobar 2011. godine.

**Informacija je primljena k znanju.**

G-din Hajder predlaže da se ubuduće materijali za sjednice Predsjedništva Saveza koji se dostavljaju u elektronskoj formi označavaju brojem ili nazivom tačke dnevnog reda.

**Jednoglasno usvojeno.**

Nakon što je konstatovao da su sve tačke Dnevnog reda iscrpljene, g-din Alilović zaključuje Petnaestu sjednicu Predsjedništva Skupštine Saveza u 14.30 sati.

Predsjednik Predsjedništva Skupštine  
Vlado Alilović, s.r.